

आकाशवाणी जयपुर-अजमेर
प्रादेशिक समाचार
दिनांक 11.03.2025 समय: 18.45 बजे

- प्रदेश मांय पीवण रा पाणी री पूर्ति तैय करण सारू पाणी रा गैर-कानूनी कनेक्शन हटाया जावेला।
- केन्द्र सरकार री आवता तीन साल मांय देश रा हर ज़िला मांय डे-केयर कैंसर सेंटर खोलण री योजना।
- खाद्य मंत्री सुमित गोदारा कह्यो-राज्य सरकार गिग वर्कर्स अर असंगठित हलका रा कामगारां री सामाजिक हिफाजत करणो तैय कीनो।
- राज्यपाल हरिभाऊ बागडे धौलपुर अर करौली मांय अहलकारां सागे समीक्षा बैठक कीनी-पढ़ाई, दवाई और गांव में ही कमाई री सोच माथे ज़ोर दीनो।

000

प्रदेश मांय पीवण रा पाणी री पूर्ति ठीक तरीका ऊं करावण सारू पाणी रा गैर-कानूनी कनेक्शन हटाया जावेला। जन स्वास्थ्य अभियांत्रिकी मंत्री कन्हैया लाल चौधरी ई सारू खास अभियान चलावण रा हुकम दीना है। जलदाय मंत्री बतायो के अभियान रा तैत नियमित रूप ऊं पाईप लाईनां माथे निगराणी राखी जावेला। आवता उनाळा मांय मौसमी बीमारियां ऊं बचाव सारू चिकित्सा अर स्वास्थ्य विभाग ई ज़रूरी तैयारियां सरू कर दीनी है। विभाग री प्रमुख शासन सचिव गायत्री राठौड़ आज जयपुर मांय अहलकारां री मीटिंग लीनी। श्रीमती राठौड़ कह्यो के आवता दिनां पड़बा वाली ज़ोरदार गर्मी अर लू री शंका ने ध्यान राखता थकां अस्पतालां मांय ज़रूरी इंतजामात् कर्या जा रह्या है। वे अहलकारां ने अस्पतालां मांय ज़रूरी दवाइयां अर साज-ओ-सामान री पूर्ति तैय करण अर टेम सर ज़रूरी तैयारियां करण रा हुकम दीना।

000

प्रदेश मांय घणखर ठौड़ां गर्मी रो असर महसूस कर्यो जावण लाग्यो है। लारला 24 घंटां मांय नौ ऊं बत्ता शहरां मांय पारो 38 डिग्री सेल्सियस ने पार कर ग्यो। बाड़मेर मांय दिन री बगत तापमान 41 डिग्री सेल्सियस नापी ज्यो। घणखर ठौड़ां पारो सामान्य ऊं 4 ऊं 8 डिग्री सेल्सियस ऊंचो दर्ज कर्यो जा रह्यो है। कम-ती-कम तापमान ई सामान्य ऊं 2 ऊं 5 डिग्री सेल्सियस ऊंचो दर्ज कर्यो जा रह्यो है। मौसम विभाग आवता दो दिन बाड़मेर अर जालौर मांय गर्मी रो येलो अलर्ट जारी कीनो है। मौसम विभाग रा जयपुर केन्द्र रा निदेशक राधेश्याम शर्मा बतायो के राज्य मांय 13 मार्च ऊं कठे-कठे हल्की बारिश रा आसार है।

.....
केंद्र सरकार री आवता तीन साल मांय देश रा हर ज़िला मांय डे-केयर कैंसर सेंटर खोलण री योजना है। केंद्रीय स्वास्थ्य मंत्री जे.पी. नड्डा आज राज्यसभा मांय एक सवाल रा जवाब मांय आ जाणकारी दीनी। वे बतायो के साल 2025-26 मांय दो सौ डे-केयर कैंसर सेंटर खोल्या जावेला।

लारला दिनां जारी करी ज्यी एक रपट रो जिकर करता थकां नड्डा कह्यो के आयुष्मान भारत-पीएम जन आरोग्य योजना लागू करण ऊं कैंसर रा मरीजां रो बीमारी री ठा पड़बा रा 30 दिन मांय ईलाज सरू व्हे जावे है। वे कह्यो के सरकार राष्ट्रीय स्वास्थ्य मिशन रा तैत किफायती अर गुणवत्ता वाली स्वास्थ्य सेवावां मुहैया करावण सारू काम कर रही है।

.....

000

भ्रष्टाचार निरोधक ब्यूरो की टीमों आज जयपुर विकास प्राधिकरण—जे.डी.ए. रा एस.ई. अविनाश शर्मा रा न्यारी—न्यारी ठिकाणों में कार्रवाई कीनी। ए.सी.बी. उं मिली जानकारी रे मुजब आरोपित एस. ई. अविनाश शर्मा माथे करीब सवा छह करोड़ रुपया की सम्पत्तियां अर्जित करण रो आरोप है। जयपुर रा न्यारी—न्यारी हलकों में वॉ की पचास सम्पत्तियां व्हेवण की ठा पड़ी है। एसीबी की न्यारी—न्यारी टीमों वॉ रा ठिकाणों की तलाशी ले रही है।

000

खाद्य मंत्री सुमित गोदारा आज विधानसभा में कहे के राज्य सरकार ऑन लाइन प्लेटफॉर्म रे मार्फत घर—घर जा र सामान पूगावण वॉ अर असंगठित हलका में काम कर रह्या मजूरों ने सामाजिक सुरक्षा देवण अर वॉ रा भला सारु राज्य रा बजट में साढ़े तीन सौ करोड़ रुपया रो प्रावधान करी ज्यो है। सरकार गिग एंड अनऑर्गेनाइज्ड वर्कर्स डेवलपमेंट फण्ड बणावण रो ऐलाण ई कीनी है। खाद्य मंत्री सदन ने बताया के ई—श्रम पोर्टल माथे 3 मार्च ताई एक करोड़ 45 लाख 75 हजार 855 कामगारों रा नाम मांड्या जा चुक्या हा। वे बताया के प्रदेश में राशन की दुकानों सारु 505 आवंटन सलाहकार समितियां बणायी ज्यी है। मंत्री बताया के जयपुर जिला में नुवी आवंटन सलाहकार समितियां बेगी ई बणायी जावेला।

गृह राज्यमंत्री जवाहर सिंह बेदम सदन में कहे के सरकार साइबर अपराधों माथे काबू करण सारु लगातार कोशिश कर रही है। ई सारु केन्द्र सरकार की मदद उं हेल्पलाइन नम्बर ई जारी करी ज्यो है। वे बताया के राज्य सरकार नुवा सुबीतों वॉ से 112 गाड़ियां पुलिस थाना ने मुहैया करायी है। बेदम साफ कीनी के पुलिस रा सिपाहियों रा भोजन अर वर्दी भत्ता में बधोतरी रो फिलहाल कोई प्रस्ताव नी है। वे कहे के पुलिस वॉ ने सप्ताह में एक दिन छुट्टी देवण रो ई कोई प्रस्ताव फिलहाल नी है। वे कहे के सरकार भर्ती परीक्षाओं रा पेपर लीक करण अर नकल रा वाक्या रोकण सारु पूरी सावचेती राख रही है।

.....

विधानसभा में पेश करी ज्यी अनुदान मांगों रो काल मुख्यमंत्री भजनलाल शर्मा जवाब देवेला। ई पाछे माली साल 2025—26 रो राज्य रो बजट सदन में पारित क्यो जावेला। विधानसभा की कार्य सलाहकार समिति सदन रो 21 मार्च ताई रो कामकाज तय कर दीनी है। ई दौरान केई खास बिल पेश क्यो जावेला। ई बीच विधानसभा में खाद्य अर नागरिक आपूर्ति विभाग की अनुदान मांगों माथे चर्चा चाल रही है।

000

राज्यपाल हरिभाऊ बागडे भणार्—लिखाई, स्वास्थ्य अर नौकरी—धंधा रा मौका मुहैया करावण माथे खास ध्यान देवण की जरूरत बतायी है। वे आज धौलपुर में जिला स्तर रा अहलकारों की मीटिंग में बोल रह्या हा। राज्यपाल “पढ़ाई, दवाई और गांव में ही कमाई” रा सिद्धांत माथे जोर दीनी। राज्यपाल सरकार की न्यारी—न्यारी योजनाओं रा तैत क्यो जा रह्या कामों रो विभागवार जायजो लीनी। श्री बागडे महिलाओं ने मजबूत बणावण सारु स्वयं सहायता समूहों ने मजबूत बणावण अर वॉ रा उत्पादों की उचित मार्केटिंग बाबत् ई कहे। राज्यपाल करौली ई पधार्या। वॉ रो काल दौरा रो दौरा करण रो कार्यक्रम है।

000

डूंगरपुर जिला रा पचलासा गांव में आज जल कलश यात्रा निकाळ र पाणी अर जमीं ने बचावण रो संदेश दियो ज्यो। म्हाणा खबर नवीस बताया के जल ग्रहण विकास अर भू संरक्षण विभाग की ओर उं निकाळी ज्यी जल कलश यात्रा में गांव की महिलाओं अर टाबरियां ई सिरकत कीनी। ई मौके पौधा रोपण अर श्रमदान करण रा कार्यक्रम ई राख्यी ज्यो।

.....

000

रंगों रा त्यौहार होळी रा उमाव सागे मिन्दरां में फागोत्सव की धूम है अर न्यारी—न्यारी ठोड़ों होळी मंगलावण अर धुलंडी ने रंग खेलण की तैयारियां करी जा रही है। गांवों हलकों में होळी रा सिलसिला में न्यारी—न्यारी रे मुजब आयोजन राख्या जा रह्या है। चूरु जिला में गींदड़

नाच कर्या जा रह्या है। डूंगरपुर जिला रा खड़गदा गांव मांय आज ढूंढोत्सव मनायी ज्यो। ई दफा होळी रो त्यौहार अर रमजान महीना रो जुम्मो एक ही दिन व्हेवण रे कारण प्रशासन पूरी तरह सावचेत है। पुलिस री ओर ऊं फलैंग मार्च निकाळया जा रह्या है, जद के जिला प्रशासन री ओर ऊं शांति समिति री मीटिंग राख र प्रेम अर भाईचार सागे त्यौहार मनावण री अपील करी जा रही है। दौसा रा जिला कलेक्टर देवेन्द्र कुमार लोगां ऊं भाईचारो बणायो राखण री अपील कीनी है।

.....
होळी रा त्यौहार ने ध्यान राखता थकां स्वास्थ्य विभाग री ओर ऊं खाण-पीण री चीजां मांय भेळ-चोळ करण वाळा रे खिलाफ लगातार कार्रवाई करी जा रही है। आज बीकानेर जिला रा नाल मांय फलौदी ऊं आ रही दो गाड़ियां ऊं करीब 12 सौ किलोग्राम मिलावटी मावो ज़ब्त करी ज्यो। कोटपूतली-बहरोड़ मांय ई खाद्य विभाग री टीम बहरोड़ अर पावटा ऊं करीब दो सौ किलोग्राम मिलावटी मिठाइयां नष्ट करवाई ज्यी।

000

प्रधानमंत्री नरेन्द्र मोदी आकाशवाणी ऊं प्रसारित कर्या जावण वाळा खास कार्यक्रम मन की बात मांय ई महीना री तीस तारीख ने विचार बतावेला। आ मन की बात कार्यक्रम री 120वीं कड़ी व्हेला। ई सारू आप ई 28 मार्च ताई मुफ्त नम्बर 1 8 0 0 – 1 1 – 7 8 0 0 माथे राय भेज सको हो। ई सागे ई 1922 नम्बर माथे मिस्ड कॉल दे र एस एम एस रे जरिये मिल्या लिंक ऊं ई सुझाव दिया जा सके है। ई रे अलावा नरेंद्र मोदी एप अर माई जीओवी ओपन फोरम रे मार्फत ई सुझाव दिया जा सके है।

000